

萬有文庫

第二集七百種

王雲五主編

鮎埼亭集

(四十)

全祖望撰

商務印書館發行

集 亭 埼 鮎

(四十)

撰 望 祖 全

書 叢 本 基 學 國

鮎埼亭詩集目錄

卷一

祥琴集 句餘唱和集

卷二

虬骨集 杪秋江行集

卷三

七峯草堂唱和集 五甲集

卷四

抄詩集 五百春光集

卷五

吳船集 韓江唱和第二集

卷六

偷兒棄餘集

卷七

漫興初集 漫興二集

鮪埼亭詩集 目錄

卷八

望歲集 采菽齋集 西笑集

卷九

雙韭山房夏課 帖經餘事集 病月集

卷十

度嶺集

鮎埼亭詩集卷一

甬上全祖望紹衣著

攝山懷古以下祥琴集

徵君淡蕩人。弓車詎可招。笑視蕭老公。愿我空曉曉。百年御碑自孱主。亦復不足揚孤標。至今雙老鶴。猶從白雲巢。右明徵君

騎省好兄弟。澄心堂上雙尊宿。朝朝下直歸。對床好句更相屬。降王既踰。遺臣亦摧辱。可憐亡國痛。盡在江南錄。一麾西邠去。苦寒入腹誰相禦。衣褐亦何妨。江左華風良貴倨。歸魂返故山。夜猿哭潛潛。吁嗟乎。十郎茶肆俱榛管。右徐騎省

孤忠有佳兒。羽林生光輝。試看蔣陵下。周粟生尙希。更愛詩思工。如鴻冥冥飛。中山孫子亦式微。白門世臣張錦衣。右張指揮

定林寺

蕭疏定林寺。傳是舒王址。暮年一壑中。空書福建子。堯舜君民志未伸。耿耿可鑒諸鬼神。擬之王盧豈其倫。泥古信匪人。遂以釀禍根。是則殊可嘖。坡陀羸馬哦詩處。白鶴紅鶴都飛去。空餘百尺松。我疑猶是元豐樹。

白下投止承恩寺見壁上戴山先生題字知爲其舊寓也正襟覽之

草莽孤臣劇可憐。先生乙酉封事所自稱。僧寮一榻坐淒然。中樞學禁方封進。淮帥彈章又至前。空有精誠感刺客。誰將血淚達穹天。百年末學重過此。肅拜如聞警效傳。

過石齋先生正命處詩以弔之

漳海精忠薄九霄。我來三吊大中橋。降臣蒙面終無賴。義士同心不可撓。閩嶠山川增卓犖。孝陵風雨已蕭寥。絕命詩中語。洞璣絕學誰窺見。天挺應推百世豪。

從朝天宮謁孝陵世傳高皇龍蛻在是宮。不在陵也。

鍾阜衣冠是與非。朝天弓劍更傳疑。難尋玉匣珠襦地。但見神功聖德碑。開國諒無慙漢祖。嗣孫底是學曹丕。當年可笑山陵使。亂命何人爲弼違。

秦淮河房追懷復社諸公

橫議多緣世道衰。黨人亦自蹈危蒹。賓寮艷說四公子。芒角猶傳三茂材。耕岩。次尾。崑銅也。歷詆太牢原過激。得沈白馬有餘哀。秦淮水畔行遊地。嗚咽寒潮帶雨來。

報恩寺

爲報高皇罔極恩。漫言當璧眷先殷。育王豈有除奸助。道衍終成佐命勛。十族固應勤懺禮。三征終莫解塵氛。碩妃別抱無窮恨。尊號曾無配享文。

筴橋有百歲老人爲予指海岸先生正命處

倔強儀曹一散郎。不隨崩角拜名王。南天半壁憑孤掌。西竺三忠共耿光。謂蔡忠襄公。暨金公正希。皆先生

禪友。而先後正命。先世淵源餘舊墨。吾鄉俎豆志甘棠。先生嘗爲吾鄉節推。于先世最厚。金剛面目應長在。鍾阜神靈助激昂。

燕子磯蘭若尋蒼翁題字

江東王氣已全枯。豈有重興赤伏符。半夜秋風出靈谷。千船軍火竄焦湖。孤生逐日空三足。碧血沈淵尙一壺。此日彌甥輯遺事。可憐題字竟模糊。

舊院

澹心居士眞耆舊。頭白操觚話板橋。豈以平康忘廟社。正從子夜哭宗祧。唐天祐中進士。遊平康詩有云。博取嫦娥扳取桂。便隨陵谷一時遷。論者以爲無復人心。葛姬大節成鸞鳳。頓老游魂寄黍苗。名士美人雙寂寞。荒江斜日逐漁樵。

循城而行偶話樞曹錢丈事

崑山寓客小錢君。忠介家風總不羣。踴躍來尋殘石碣。佯狂臥報蹙將軍。謂甘輝。婺垣有婦成雙節。桑海何人錄舊聞。爲對故城生感槩。冲天一鳳溯奇勛。

坊中買千頃樓舊書

風流比部住籬門。六萬牙籤四庫分。曾與淡園稱繼霸。至今藜閣藉雄文。明史藝文志稿。出俞邵手。故雍殘刻成飛絮。徵士遺鈴亦斷紋。誰道卿雲長擁護。震川語也。由來過眼盡浮雲。

阮懷寧居今爲揚商寓所

圓海居停尚有存。當年道路目凶門。蝗男錄就誅餘孽。燕子箋成上至尊。東澗老來重納拜。幸存錄謂錢尙書以門生禮見圓海。今本多刪去此語。崑銅痛定亦招魂。今逢潦盡潭清日。敗瓦殘扉落月昏。

臨川先生主試江南中途得疾入闌少愈而并日閱文失于調攝未及畢事神明頓索不可收矣予渡江視之先生以三年別緒絮語諄諄莫非關注深切之言而督亂無復詮次爲之悽愴先生素康強不料其至此也舟中得詩三首

滿眼秋光喚奈何。天根一夜涸洪河。據鞍馬上雄心在。曳足壺頭恨事多。猶爲吳儂慰蕉萃。誰知老子已婆娑。萬夫稟植今如此。阮亭王公。嘗稱先生以萬夫之稟。見分甘餘話中。始信人生易折磨。追思適館賦緇衣。倒屣傾筐世所稀。互舉遺經攻墨守。每論佳士致神飛。參差苦塊三年別。潦倒春明昨夢違。天爲一陽扶碩果。肯教黃葉共摧隤。副主考官金君德英爲予言。先生途中。旦旦念予不置。廿年前度幾掄才。桃李都歸帳下栽。具眼不愁方叔屈。雄文爭望竟公來。神龍際會真難得。老鳳菁華忽驟衰。那得重占七日復。元神爲捍舊丹胎。

臨川先生病中猶古人出處之義漫呈絕句五首兼柬東胡撫軍復齋宗臣絳灌正隆隆。況復肩隨鄧侍中。何不洛陽高臥去。漫勞鵬鳥度湘東。申轅報罷董生黜。更復誰同汲直羣。自分不求五鼎食。何妨平揖大將軍。茂陵男子家風在。肯向扶風作詭隨。亦會遭逢有天幸。不然那得遽伸眉。誰言王掾是癡生。直把桓溫喚老兵。不見郗郎空入幕。老投臨海一荒城。

生平坐笑陶彭澤。豈有牽絲百里才。稊未成醪身早去。先幾何待督郵來。

敬亭沈耕岩先生卒後七十年而未葬。予將謀之臨川閣學。檄下有司助之。而臨川病甚。弗能及也。

爲之慨然

嵯峨烈廟故徵君。潦倒南都一黨人。猶喜清流完白首。竟無坏土貯青燐。枯心早已填窮海。殘骨還堪贖百身。五角六張多厄運。敬亭草木亦傷神。

再送臨川先生于揚關。神氣困悴益甚。然臨別猶推篷窗呼予者三良可悵也。

天氣是爲魂。地氣是爲魄。斯人所護持。仗此雙丸力。石亦有時剝。金亦有時消。何況七尺身。百憂所感撓。所貴學道人。神明長春融。諸艱不能折。垂老或愈充。堂堂人中虎。夢周志未衰。顛毛雖種種。猶思奮驚雷。誰知驥且老。漸看魚已頽。乃緣小遠涉。遂致大摧零。北闕何迢迢。西風正發發。登車三回首。屏營不可別。永懷姑射神。尸居養天和。尊生良有術。身孰與世多。四句用止齋寄同父語。

嶰谷招同復齋孺廬泚江南軒登平山堂

地以歐劉重。情緣僑札殷。風流推夙老。濩落感同羣。謂南軒。楊柳春風杳。芙蓉夕照曛。一堂賓主勝。三沐誦雄文。是日讀孺廬題嶰谷燕堂小記。

姿地原無輩。家風好共夸。孺廬三耶露山。石蓮花接葉。萬光祿思嘿講易地。玉茗樹駢葩。孺廬言其家園玉茗之盛。良會思前哲。高才賦落霞。吾衰期掉首。歸理舊漁槎。

朱上舍自天讀予悼耕岩未葬詩而蹙然請以明年任之喜而有作

徵君未歿日，破戒受兼金。爲葬鍾山骨，餘投瀨水陰。耕岩不受達人之餽，以葬故人，乃收一令百金，用其少。而所餘者，投之蕪湖水中。清芬猶未泯，高誼更誰尋。一諸來孤鳳，微生慰素心。

孺廬編修再次前韵二首索和

天上玉堂夢，羈愁五載殷。相逢大江北，重與話離羣。老屋連薨住，醇醪永夕醺。士安如見外，誰復定吾文。孺廬許爲予序拙集。

探得遺經諸，寧將曹李夸。祇應憐末學，亦復媿繁葩。元氣收秋實，榮光爛早霞。一壺回逝水，津逮有星槎。座中語及江都世擅文選之學。

牧齋本與茶村相契及國初竟陵譚侍講主試江寧致敬于茶村如燕太子所以事荆卿者茶村叩之則長跪流涕曰欲先生爲吾家報世仇也茶村嘿然是日餞別侍講詩有云海內于今極可憐江南遍唱李龜年指牧齋也而是後操戈于初有學集者實由之始矣唐丈南軒語及因紀以詩門戶紛紛禍未休，可憐文字亦戈矛。當年宿老先挑釁，易世兒曹繼復仇。彼我相觀均一笑，古今岐視實同邱。須知根柢皆疏薄，誰是江河萬古流。牧齋與伯敬以同年有隙。

茗上蓮花莊泊舟因訪清容軒故址

宗姓真麟角，公孫亦鳳毛。相尋白蘋渚，握手話風騷。我亦勾餘客，清才媿二豪。一枝何處是，七觀已蕭寥。小山堂賦荔枝酒

一甕離支酒，迢迢自粵中。誰憐成粹白，幾費擘輕紅。味以淡彌旨，香緣清若空。清若空，禾中酒名也。乍疑

錯着水坡公稱羅家白爲錯着水。牽率譜詩筒。

聞道三年後芳膏變墨香。風塵感縑素。物態反蒼黃。守白應難久。通元別有方。勞君且封閉。莫漫倒樽嘗。

胡京兆鹿亭製墨最精。近日散亡殆盡。鈍軒貽予一九。因賦二律。

敬義堂中五鬣精。取材百和莫能京。望雲夢入黃山近。染翰香同赤水清。京兆歛人而居鄆。柏府嚴霜留點漆。蕉窗寒露發光瑩。昔賢撰搆誰能繼。磨墨磨人媿後生。

餘事猶能擅墨精。畫眉雅韻重神京。五雲筆扎絞而婉。十笏齋房明且清。清閼誰人長護惜。寒芒竟夜尙昭瑩。臞臞查浦題楹字。猶共芳烟百媚生。查浦學士爲京兆作墨桃符。

蘅圃先生齋中研皆有班次。其第一研今歸趙六意林。索詩爲銘。

蘅圃先生第一研。手校春秋唐三傳。餘閑或點玉田詞。經術文章雙著案。意林洋州之文孫。其談春秋醇乎醇。偶成小令亦清妙。謝山慶爾研得人。

吾鄉自鹿亭京兆後。張大令萼山李太學東門製墨皆良品也。而今多不可問。賦之以爲墨苑中留故事焉。

當年共鬥黑松精。方邵諸公不足京。眉閣老人賦三絕。蝸廬跛叟擅雙清。魂歸碧落還同譜。力與青瓊共比瑩。過眼雲烟紛感槩。摩挲故物話三生。

陳丈南皋以興化鄭居仲所著諸種見示。追憶去年里中有爲興化守者。予貽書令其訪居仲遺書。杳然無耗。詩以博笑。

夾漈好孫子。平生喜著書。桑田志虎豹。漳海紀蟲魚。居仲遂志錄。予曾見之。虎豹。謂鄭芝虎芝豹也。以此消春晝。兼之慰索居。沈周是何物。俗吏足軒渠。昔蘇州守有問吏人者曰。沈周是何物。

海若累許惠漳茶。未見踐約是日見。其齋中已放徑取其佳者以歸。詩以釋言。

殷紅粹白成連理。天巧人功各到頭。宿諾未應長見款。責言亦復更誰尤。曹柯返地知何術。楚客忘弓且莫愁。從此漳茶添典故。巧偷豪奪總風流。

方侍郎南靈臯得請南歸

正色立朝原不易。乞休得請更何求。早知積悃終難遂。從此餘生且自由。碩果固應邀護惜。晨星誰爲解勾留。歸家蒼得平生業。儒苑文林志可酌。

梅雨彌旬奴子以絕糧告

連綿瓜蔓水。漏天阻步履。堯韭尙滿廚。禹糧不繼饁。闌風日怒號。薄寒中白袷。湖光綠盈盈。彌望生杏萋。呼童具鹽鼓。芼之堪共沽。平生耻溫飽。此報亦足愜。室中呼菜婦。爲我理殘篋。微吟乞食詩。再臨乞米帖。

同館出爲外吏者率以書訴困悴戲答三絕

諸公強半厭承明。潘陸風流亦可稱。何事五窮終未送。依然冷況一條冰。疎狂容易犯科曹。幕府誰能恕折腰。莫笑淮王昧稱謂。從前地望本清高。清虛只合謫蓬萊。豈有揚州鶴信來。若使脂膏良可覲。阿儂捧檄也顏開。

哭萬編修丈九沙

日昨吳回厄。非關隱匿招。痛心遂莫挽。老淚竟難消。宿德嗟淪喪。知音嘆寂寥。秦亭古梅下。風雨泣蕭蕭。去年。九沙家大火。盡焚其尊人充宗先生經學未刊之書。九沙援夷伯廟震故事。以爲已咎。朝夕涕洟。遂以不起。亦可傷也。

題柳堂姬人劉氏王香圖劉氏崑白名璧閩人

深柳堂中彥。蕭疏最絕塵。苦心啖薇蕨。高致擬松筠。一束鼠須筆。數枝閩嶠春。王香不着地。郎主亦傷神。訪南谿入鶴浦坐。雨卽賦南谿家園以下句餘唱和集

書帶草堂故都督施公二華題額。

吾家先宮詹。湖上集羣公。峩峩施都督。裘帶參芳踪。將軍不好武。雅歌酌詩筒。書法猶入神。滇海紅雲紅。都督爲沐黔公題紅雲二字。最馳名。佳節殉亳社。良不負阿翁。可憐故里第。書畫隨飄蓬。猶餘殘竹林。髣髴遡清風。都督有竹中精舍。清風閣。在湖東。今已累易主。所幸佳宅相。尙貯墨妙濃。階前老書帶。葱翠一百弓。于今已三世。春秋享祀豐。吁嗟此書帶。故國遺臣封。莫視作小草。行與喬木同。

二老閣

奎芒萃黃竹。篤生有魁儒。一陽在黍谷。出自九畝餘。膺滂陪黨籍。文陸共簡書。晚歸雙瀑院。殘經理蠹魚。招邀遍江東。鶴浦尤其渠。秦川故觀察。同聲和于于。扁舟時過從。素心不可渝。江村擬漢陰。龐馬足並驅。高州紹墜緒。報本時瞿瞿。有子承先志。傑閣凌太虛。春秋仲丁日。少牢荐香醑。百年噓薪火。二老降履絢。試看午夜分。五緯臨前除。

半生亭

嶧陽孤根桐垂老枯其半生意猶融融清音不可亂吾懷寒村老彩毫凌霄漢遠承戴山傳先登南雷岸高涼投絨歸一臂忽以絆蟹螯尙可持所失啣杯便閑情寫雲烟左筆資清翫益復自欲然望道如未見高州臨終自謂全無是處斯人不可作舊德傷汗漫江潮滾滾流斜陽入絳幔剩餘東天竺繞亭白華粲

石叟居

石窗通萬山石樓臨絕谷其北爲翠碣石叟所小築石叟有硯山朝朝寫蛾綠何須千峯秀只此一峯足五馬抵高州旁午逢寒玉嫣然一咲粲會逢我所欲陸郎鬱林船多載不爲黷又況叟不多三五孤峯矗遂成小洞天微雲淡枯木仰看大者宮俛臨獨者蜀班班高麗盆凝乳堪果腹石存卽叟存下拜不嫌數大椿堂

南谿侍半翁手種靈椿樹意美足垂芳心閑因得句卽用高州題檻語綿綿不朽人令德永終譽形逝神長留奚止八千度年來愈穹窿彌天飽霜露千枝蜜色護池塘發香霧椿以懷嚴君護以篤慈祐更有萬歲藤相依如蔦菟椿樹下有藤綠之而上夜月度廊腰交柯相回互南谿亦老矣不杖猶飛步吾疑此壽藤卽以綏遐祚風雨共晨昏爲君慰孺慕

西江書屋

浙東藏書家首推天一閣其後淡生堂牙籤最審推于今有鶴浦善在精且博我觀古著錄諸家亦焚錯藏書不擇書糠粃混精鑿藏書不讀書皮置憐寂寞讀之或不善喪志空作惡南谿眞書倉萬選錢在索

收拾南雷書。門牆幸有託。反疑過高妙。一切棄糟粕。我生苦謏聞。漁獵久荒落。何時得假館。疑義相彈搏。直溯西江波。以濟枯魚涸。

一隅閣

南谿志遊山五嶽造其四。聊復留有餘。衡陽未之至。歸來厭華堂。一隅成小憩。壺公以壺栖。巢父以巢置。人生苦局齷。耳目限于地。莫夸雲夢寬。適增夜郎媿。南谿具神勇。芒屨百兩敝。退之所回車。游行心不悻。壯觀歷天涯。老倍添奇氣。小閣低于艇。此中正無際。我來阻淫雨。登閣消清秘。遙望五嶽雲。茫茫生遐跂。雪嶠和尚雙瓣香。行雪嶠弟子極盛。而傳香者。一爲黃公端伯。一爲徐公啓睿。並歿國難。

南湖侍御之諸孫。偶然墮落浮屠門。雖然墮落浮屠門。依舊忠孝光大倫。請看龍象紛蹴踏。座下何止三千人。上瓣香終莫有分。以待海岸居士大善根。輾然一晤傳秘薪。比之妙喜得橫浦。峨眉天半倍覺軍持尊。敬致一瓣香。上紹龍池君。是誰足稱後來秀。莫令海岸孤另傷寡羣。里中徐郎其殆庶。顛狂之中蘊道真。俯視餘子陸陸如秋蚊。再寄一瓣香。以接西江雲。忽然不周山崩天柱折。恒河之沙亦狂奔。海岸一瓣香。金剛洗出刀山痕。南都半壁足慰鍾山魂。徐郎一瓣香。鷗冠闖入蒼頭軍。會稽甲盾足陪胥江神。重泉相逢定一笑。徑山雙虹貫日輪。

複壁篇爲劉乙然妻周氏作。

平山堂上火雲飛。廣陵城中命如雞。梅花嶺頭莖遺衣。甬江劉生廣陵客。中夜怱怱築複壁。呼我鄉里且避迹。嗟哉妾身願先歿。忍聽隔牆掠夫子。暗中投繯不可止。暗中有鬼反勾留。天乎留我將遭尤。此身可

歿不可差。試看洵洵百輩至。聊爾複壁那足恃。蘭摧玉碎頃刻事。明晨穿壁出堂堂。呼我愛女先上梁。東西兩頭歿相望。須臾鐵馬又周遭。果然破柱索逋逃。芳魂已過廿四橋。爾時鄉衮誰并命。通守王郎周大令。居然巾幗高名並。梅花嶺頭老督師。夜謁孝陵前致詞。乞得旌書表素絲。我更爲添黃絹詩。

羊山吟爲蒼水尙書作也。昌國大洋有羊山。多羊。然不可烹。蓋神物也。尙書泊軍山下。軍士不知而烹之。未熟

而風濤大起。軍士溺者無算。義陽王豫其禍。今世人謂以羊府君廟得名羊山者。謬。

殺函失鹿鹿有歸。芒碭斬蛇蛇弗違。赤烏白魚歸新命。陳倉雄雌寶雞雙雙飛。孤臣徒搏雕虎將。何爲爾羊來思角戢戢。馴擾直似鷗忘機。鷗兒軍士偶不戒。誰知忽震天狼威。鞭龍龍髯墮。駕羆羆梁疲。騎鯨鯨尾赤。跨鯨鯨背危。神鰐出沒封豕隨。水犀八萬聲如雷。鶴乎鵝乎一網盡。爾羊助天爲虐是耶非。孤臣獨抱啼鵲悲。吁嗟乎。孤臣獨抱啼鵲悲。

鷗波道人漢書嘆牧齋宋本漢書。有鷗波道人小影在其上。後以兼金歸吾鄞之謝氏。鄭山徵士作記。謂道人不應以元裝加之漢書。蓋有所諷。

絳雲樓中十萬卷。鷗波道人漢書最珍奇。晚以兼金歸甬上。擬之江南國主揮淚別故姬。卽錢氏跋尾中語。見有學集。周郎展卷三嗟咨。漢書卷首何無漢官儀。周郎斯言豈獨悼鷗波。身世百感蓋紛披。一歸海虞再甬上。名節遞降難言之。平康故院爭柳妓。謝與錢爭柳妓。幾於操刀。晚來賣國同符契。不獨衣冠慙司隸。周郎揜卷封羊祭。何不補寫平陵之歌弔翟義。此書後歸張坦公侍郎。以貢內府。不可復見矣。

阿育王山晉松歌

五馬浮渡江一馬化爲龍。遺麟夜墮浙河東。遂成阿育王山之老松。風饕雪酷一千七百載。取精醞靈良已濃。忽然寒芒發古幹。猶疑典午劫火青熊熊。桃源桃不見。栗里栗已空。蘭亭之蘭成荒叢。誰似茲松長葱葱。何人附會梵力雄。謂是劉郎舍利著芳蹤。應笑劉郎故物遷播如轉蓬。而今雁鼎祇合謾村童。巋然老松乃神物。豈關八萬四千塔影所昭融。梨洲老人夸智果。倘校資格那得同。諸君且和我。叉手松下哦長風。八叉未竟驚濤出。松花散落光蔚蔚。想爲詩人曜渴筆。我詩便與老松雙突兀。

東鈍軒

蓬廬墓版出梨洲。名德由來甲甬勾。誰與使君振清白。應憐公子最風流。滇黔秦楚題名徧。水墨烟雲禿筆收。祇有一端成缺憾。醉鄉茅土不封侯。

雙湖竹枝詞

儂家日月湖邊住。題過楊枝又橘枝。慙愧慶豐新樂府。誰教傳遍冶春詞。宋慶豐樓在官酒務中。

廣生堤放唱谿娃。大阪秧田曲子嘉。驀地清風吹別譜。一聲聲是浪淘沙。西湖曲皆淘沙戶。

春晚洋山魚計盈。滿湖小種亦神清。郎船夜旁竹洲宿。天半天封塔火明。洋山魚期至湖上。亦有小種名銀鍼。

聖功寺北報鯨鐘。西岸蟬連四佛宮。郎若更尋雲寶去。禁聲維衛尙居東。四佛宮。謂聖功寺。能仁觀音寺。

感聖寺。崇教寺。

楊家孤子女兒裝。碧海青天怨未降。閑向亮公乞神識。長明燈下荐爺娘。亮公。唐開元五臺寺僧也。

初元夾岸麗人行。莫是袁家女飯僧。若到更深休戀戀。湖心怕遇牡丹燈。湖心寺舊爲袁宗正公女道場。